

乙巳年梅月念八日 本壇主壇司柳星君降 詩

莫怨天心護不公 一分善德一分功

斯時果滿仙班列 斯悟玄機慎始終

述天人之命

夫人生天地間，應知天地顯明之道理，毋或悖天而行，方可立身於人世。即所謂不知天，何以為人乎！蓋曰：「天之所以為天，人生天地之中，可不盡為人之責乎！」不知其所以為天，即無以知其所以為人。聖神仙佛，亦人也。皆由忠孝節義而立基，所以人而為聖神、為仙佛。凡有血氣者，當體天以為心，無為其所不為；無欲其所不欲，此天之心也。天之心，即天之理；天之理，即人之良心。心之良，即天良也。人而昧其良心，即所謂無天良也。人無天良，枉其為人。是以人者，不可失其本心。孟子曰：「仁，人心也；義，人路也。舍正路而弗由，放其心而不知求，誠可哀哉！」又曰：今有無明之指，屈而不伸，非疾痛害事也。如有能伸之者，則不遠秦楚之路而求之，為指之不若人也。指之不若人，則知惡之；心之不若人，則不知惡，此謂之不知類，即無以知天人之命也。